

## *Jahresrückblick 2013*

Diesmol fong i a bissale früher on,  
im Dezember 2012 hot sich nämlich wos geton.  
Da Wolferl hot ghobt a guate Idee:  
an Freebikerstammtisch! Und bei Költn und Schnee  
san Anige gfoahrn ins Azurro zum Essen  
und vor allem zum Ratschen, net zu vergessen.  
De Idee, de warat jo zum "Faken",  
an Kärntner Stommtisch könnt ma "maken"!  
Auf gut Deutsch, mit einem Wort:  
mia homa gsuacht uns a an Ort.  
In Klagenfurt im Felsenkeller  
sitz ma gach zsomm - bei volle Teller!  
Da Mickey wollt a noch a Runde gasen,  
is ghopplt zum Weihnachtsmarkt gleich einem Hasen,  
bis sei Shadow auf Touren kam,  
zwecksn Schnee die Tour bald ein Ende nahm.

### *Jänner*

Und wieder hot a Großer das Wetter gmustert,  
wals eam hot a goraso glustert  
am 4.Jänner a Runde zu drehn-  
unser Mickey holt - diesmol wars Wetter a schen.  
Und nix Neigs erzöhl i eich jetz,  
wenn i sog: das Frühstückn wor immer a Hetz'.

Wenn die Rita zum Frühstück 2 Jägermeister nimmt  
könnts sicher sein: Wohlbefinden und Verdauung stimmt!

### Feber

Saisonstart im Feber - igitt, oh Graus!  
Dem Michi 1150 mocht des Wetter nix aus!  
Wo i noch bin beim Ofen ghuckt,  
hot er sei Moped durch die Gegend gedruckt.  
Die ondern hom gekegelt, gfrühstückt und gessen  
und san bei Wolferls Stammtisch zsommgsessn.

### März

Im März der Schnee noch immer net zarinnt-  
und damit der Speck net Oberhand gwinnt,  
fong ma wos zum Tuan on-  
da Erste -Hilfe- Kurs is zerst amol dron.  
Helmabnahme, Puppe pumpen,  
beim Kegln loss ma uns a net lumpn!  
A wenn's bei mir nia klingln tuat:  
Löcher schiabn kann i guat!  
Motorradlmessn gibt's a en gros,  
dos wär jo glocht: jetzt gehts bold los!

## April

Wer geglaubt hot, dass des heuer nix mehr wird,  
hot sich getäuscht - beim Sulmwirt  
war Saisonauftakt mit anige Leit.  
Der Alex kam net ganz so weit,  
aber doch bis hin ins Route 69,  
beim Hamfoahrn kehrte er noch bei mir ein.  
Das Fahrsicherheitstraining kam a alsbald,  
i war gmeldet - 5 Grad... zu kalt!  
Während die ondern ihre Mopeds druckn  
bleib i Weichei im Warmen huckn.  
Die Burgenlandrunde über Gschriebenstein,  
plante Wolferl wieder amol ganz fein.  
Strecke, Spaß - es war alles a Hit!  
Nächstes Joahr möcht i a amol mit!

## Mai

Die erste Forumsausfahrt - abgesagt-  
das Wetter hat uns echt geplagt-  
doch war's net überall dasselbe!  
Drum warn in Gralla doch zur Stelle:  
Brigitte, Michi, Alex und Mexx-  
und sonst kana do? Sie warn perplex!  
Der Ludwig hot glei reagiert,  
und sie zu sich zum Kaffee dirigiert.  
Im Route 69 hom sich a poar noch eingefunden,  
um den Tog donn lustig abzurunden!

Die Wallfahrt war am 12. Mai,  
do warn ganz viele Leut dabei!  
B4S hot schon an Namen  
und über 70 Motorradl kamen.  
Nochdem i kenn schon Börny's Tuckn,  
tua i bei eam wieder hinten aufihuckn.  
Doch diesmol hob i gschaut verkehrt,  
i glaub, die Fotos warn des wert.  
Der Paul als flotter Ministrant,  
ging dem Herrn Pfarrer glei zur Hand!  
Geduldig hot e'rs Topferl gholtn  
mitm gweihtn Wosser, dem kleschkoltn,  
ging neben dem Pfarrer mit durch die Reihen,  
um uns und olle Mopeds zu weihen.  
Des Ludwigs Stimme, hell und klar,  
rief übern Platz laut "Monika".  
Artig bin i zu eam umeglofn,  
durt hot mi fost der Schlog getroffn:  
A Lesung soll i durchs Mikro mochn,  
da Varamani findet dos zum Lochn -  
i net, aber so schlecht bin i scheint's net gwesn.  
i hob nämlich a noch die Fürbitten dürfen lesen!  
Fischessen im Mai mit Manitu,  
das ghört jo eh schon richtig dazu!  
Am 25. Mai, nach viel Verschieben,  
hob i donn das Kuchenbuffet ausgeschrieben.

Und wia des heuer holt so woar:  
a grausigs Wetter-des wor kloar!  
Da Ludwig und da Rudi sind  
mitm Moped kommen gschwind,  
die ondern homs Moppale stehen glassen  
und warn mit'm Auto zum Kalorienfassen.

### Juni

Da Juni wor kolt und noss, des wisst's eh,  
trotzdem sama gfoahrn zum Hafnersee  
bei da 2. Forumsausfahrt im Kärntnerland,  
a klanes Trüppchen wor ma doch beinand.  
Die Rita hot ihre Fiaß gwakt drin im See,  
"Kneippn" holtet gsund, des wiss ma eh!  
A Übungstog wor a wieder dabei,  
des schodet nia- des is uns net nei.  
Da Arni hot ausgeschriebn die flottn Rundn  
für de, de gern zügiger die Gegend erkundn.

### Juli

3. Forumsausfahrt - Varamani organisiert,  
diesmol zur Teichalm gfahren wird.  
Viele hom sich ihm angeschlossen  
und an wunderschönen Tag genossen.  
Die Andy, der mofa und a i  
worn am Dobratsch oben noch nie.

Da Alex mant, des wär jo glocht  
und glei a Ausfahrt durthin gmocht.  
Tom, Tina , Eva worn a mit von der Partie-  
a Aussicht dort oben, de vergess i nie!  
Die 3.Kärntntour, a vom Alex organisiert,  
weit umatum hot er uns gfiahrt.  
Noch Villach über die Autobahn,  
von dort auf die Kölnbreinsperre dann,  
ham ging's über die Nockalmstroßn  
in Feldkirchen homa die Villacher donn valossn.  
Da Kirsi wor im Juli a on Tour,  
die Gitti a am Dachstein, nur  
is sie allan gschwebt auf der Aussichtsstiagn-  
da Ludwig zog's vor, zu fotografieren.  
A im Juli warteten schon:  
19 Mopeds in Startposition!  
Auf nach Duino - es war soweit  
für stattliche 21 Leit!  
Gwandert sama,ausgrüetet fost fürn Mont Blanc,  
doch leider wors donn net a so-  
den Rielkeweg homs noch kurzer Streckn leider gsperrt,  
wurscht - Aussicht genießen und ins nächste Beisl eingekehrt!  
Mia hom uns die Laune net lossn verdrießen,  
tuama holt Wosser, Bier und Discomusik genießen!  
Andy und Mofa zog's glei in die Fluten,  
statt mit uns do beim Wondern umazugluten.  
Hannes und Gebi hom die Bootalan interessiert,

also sans mit der Kamera zum Hofn obespaziert.  
Beim Abendessen san uns die Euro weggronnen,  
oder hot dem Kellner sei Amolans leicht gspinnen?  
Zu erwähnen a: wen i beim Charme" gonz oben" ansiedl:  
nämlich unsern lieben Gernot Riedl!  
A Mundwerk hot der, do kummst mitm Hurchn net mit,  
kassiert hot er von der Christa so monchen Tritt!  
Und wal er frech wor, mehr als für zehn,  
hot er bold amol miassn schlofn gehn!  
Da Werni1, unser Gipfelerklimmer,  
is beim Mundwerk a gach amol a Schlimmer!  
Doch hot die Jutta eam guat im Griff  
und verpasst eam, wenn nötig, den richtigen Schliff!  
Um 6, als viele tief noch schliefen,  
hörten einige, dass die Wellen sie riefen.  
Flugs wurde ein Morgenbad genommen  
und gmiatlich a poar Runden gschwommen,  
bevor zum Frühstück es ging bald,  
bis der Ruf "Aaaaufsitzen" von Gebi erschallt.  
Das Navi war top, die Sonne hat glacht,  
a Ehrenrunde homa trotzdem gmacht,  
bevor ma mit vollem Tank und leeren Blasen  
in Richtung Heimat über Pässe gasen.

## August

A Ausfahrt in die Kaiserau,  
plante der mofa ganz genau

an an haßen Tog jo wia nua wos,  
vom Schwitzn worn olle waschelness.  
Und a beim Bikerinnentreffen im Route 69  
wor die Hitze a net wirklich grad klein.  
A Schwitzerei homa beinond ghobt in dera Saison,  
aber wurscht- hätt's gwaschlt, hätt ma gor nix ghobt davon.  
Am 11. August: die 4. Fohrumsausfahrt dann,  
da Wolferl hot gführt: die Käfalan worn dran.  
Viel Teilnehmer hot er ghobt nach Gaal,  
das Tempo wor grad a net schmal.  
Dort wor echt a Superbuffet aufgebaut,  
do hot sogar da Wolferl gschaut.  
Noch'm Essen donn, zum Verdauen,  
musst i den GeryC beim "4 gewinnt" einihaun.  
Amol gwinnen gegen mi hätt eam gepeckt,  
doch hot er's Spiel net gonz gecheckt!  
Drum sama zum Museum losspaziert,  
durch dos der Chef uns donn hot gfiaht.  
Gfoahrn san heuer gonz schen viel  
aufn Vrsic und aufn Predil.  
Dazua hob i a noch den Mangart erklommen,  
de Kurvn hob i holt net zu gach gnommen-  
schen kamoti immer rum ums Eck,  
vom Ausblick oben wor i donn gonz weg.  
Da Alex hot im August noch amol  
wos geplant: a Fahrt nach Südtirol.

6 Mann/Frau war ma an der Zahl-  
i fuhr dorthin das erste Mal!  
Viele Pässe und, wer hätt sich's gedacht,  
a jede Kehre homa "flott" gnommen, wär jo glacht!  
Doch als ma den Gaviapass ham erklommen,  
wor ma olle etwas benommen.  
A gflickte Stroßn, enge Kehren,  
Schweißperlen begannen sich zu vermehren.  
Da Alex sogt da Eva immer  
ob's frei is- besser geht's jo nimmer.  
Die Geduld von Mexx muass i a noch sehr loben,  
oft hot er sei Moped hinter mir fost um die Kurv'n gschoben.  
Da Gery wollt sich oben a Leibale kafn,  
wal eam nix is in die Hosn einiglafn!  
Da anzige Admin hot gwirkt recht entspannt-  
i glab fost, der hot'n Gaviapass schon gekannt.  
Das Stilfserjoch, a richtiger Hit!  
Beim Obefoahrn war der ChillinSpeed mit!  
Und wia's so is, die Welt is klan,  
die Eva denkt: i man, i tram!  
Da Wolfgang is nämlich ihr Cousin -  
seit Johren hom sie sich nimmer gsehn!  
Die Eva tuat wos sommln, nämlich Löffalan,  
drum hot sie a schon so viel verschiedene daham!  
In die Gasthäuser gibts holt nia die gleichen-  
noch Kaffeepausn homa immer schnell miassn ausischlechn,  
bevor der Kellner die Löffalan zählt

und draufkommt, dass do jo ans fehlt!

## September

Die 5. Forumsausfahrt folgt sofort:

a Menge folgten Ludwigs Wort:

"Seid pünktlich in Eibiswald vor Ort,

ihr wissts genau, dass i net woart!"

In Lavamünd donn obakommen,

hot er flott die Kurvn gnommen!

So hot er holt uns 6 verlorn-

so wia die Andy ihr Tafalel beim Foahrn!.

Als Kärntner Navi durft i sein da Leader

und hob sie eingeholt in Viktring wieder!

Pause donn beim Aussichtsturm:

gschmalzene Preise, doch grutscht is gwurdn.

Beim Mochoritsch homa flott donn gessen,

die Kellner san uns im Gnack fost gsessn,

um abzuservieren das Geschirr-

so schnell Suppn glöfflt hob i noch nia!

Floßfahren sama heuer a,

viele warn mitm Moped da.

A Begrüßungsschnapsale, a so a Graus!

Des holt i in da Fruah net aus!

Bei den meisten is es die Gurgl obegronnen,

dann hama alle Platz genommen.

Richtung Dravograd und retour sama gfoahrn,

das Grillbuffet is dawal fost aufgessen gwordn.

Alex und Kasawaki san am Floß umeinanderspaziert,  
in der Hoffnung, dass da Bauch vom guatn Essen klana wird.  
Ob's was gnutzt hot, jo des waß i net,  
ausgchaut hots jedenfolls a bissale bled.  
Aber des is wurscht, Spaß hots senan gmocht-  
denk i, wal sie hom dabei mords viel glocht!  
Und ans hot sich gezeigt, gonz kloar:  
als Kinderschreck a guates Poar  
san Ludwig und der liebe Herr Riemer-  
de Floßfahrt vergisst mei Martin nimmer!  
Fost homs eam gschmissn in die Drau,  
warum, des waß i net genau-  
a Klanigkeit holt, wal- und des is net glogn:  
mei Bua is schließlich wohlerzogn!

## Oktober

Der Oktober ist da - worauf noch warten?  
Auf geht's zum Maronibraten!  
Kolt war's, trotzdem san viele gfoahrn  
auf 2 Räder- der Rest holt mit'n Goarn!  
Doch des is wurscht, wichtig is, dabeizusein  
beim Saisonabschluss im Route 69!  
Da GeryC hot Maroni und Brater organisiert,  
hinter der Theke war Robert der Wirt!  
Unsere Herbstfahrten warn alle noch schen,  
doch die Saison ist am Zuendegehn.

## Schluss

Fürn Admin und'n Ludwig hob i wos  
und zwoa fost frisch aus Zakynthos,  
wo i heuer gwesn bin-  
a poar Spezialität'n san do drin.  
Für oll eure gonze Forumsplog  
i damit euch jetzt "Donkschen" sog!  
Und a für olle ondern hob i wos gmocht:  
hom doch die Kirschn heuer so obaglocht  
von mein riesengroßen Baum-  
und siehe da, man glaubt es kaum,  
worn sie gebrockt und a entkernt,  
ohne Wurm - den hätt i entfernt -  
gekocht und obgefüllt - bleibt jetzt zu hoffen,  
dass euren Gschmock i hob getroffen!  
Jetzt "habe ich fertig" und verzupf mi schon,  
i gfrei mi mit euch auf a neige Saison!

Moni 2013